

Pwoo de Pool ran nen Afisus Mo

¹ Pool laalep Kristi shi ræbet Naan, shindæm pee nen Naan de mo ndææn nyil Afisus, de mo shinzeen nJesu Kristi azeen-nzeen.

² Deret kə ryang mə Naan puun fun kə Daa fun Jesu Kristi mo tong ashak kə wun.

Deret De Mo a Mə Riin nDææn Kristi

³ Mu pəlang Naan puun, kə Daa fun Jesu Kristi, dewur le deret wur nkaa mun, shi koo a deret dedangyi de nə a mə Riin ndææn dengnaan mo, shi Kristi.

⁴ Akudang Naan wur leyil nə, be wur kə ten bəlep mun, mbəkə mu dee a mə wur ndææn Kristi, mbəkə mu dee de a dəbang ndææn wal mbəde baa mee shikbish di ntoom nwur kas.

⁵ Naan kə ten sat nee, ndææn Jesu Kristi, be dyin nle kə mun dee a jep wur mo. Desə nə put a ndææn pan mə retnyit wur.

⁶ Wu yit kə mun kwoop wur mbə dedes mə yit naajeel nwur, dewur shiın mmun nzuum ndææn Lää wur dewur wal wur.

⁷ Mbəde a shi muut Kristi dangbe mo fween mun, shii mənə a nee, mo fwo shikbish fun mo mmun. Yit naajeel nNaan nə des zam,

⁸ dewur doo nə nkaa mun des, kə seen kə manshii mbii mo jir.

⁹ Yaksə Naan wur le kə mun man mbii de mo a səsok mə pan wur mo, nciit-nciit kə pan wur

dewur kə ten le nə, kə nə dee a degəgam ndəən Kristi.

¹⁰ Mbii de Naan wur kə ten sat nee, wudyin ncìn mo katdang pee nə wul. Be Naan wur njì kə mbii dewur kə ten le mo ndəən nyil desə ashak, kə de mo ndəən dengnaan kə de mo ndəən nyil desə jir, be Kristi wur ndee a káa mmo jir.

¹¹ Mon cìn mbii mo jir a nciit-nciit kə mbii de Naan wur kə ten sat nə wudin cìn mo. Naan wur ten bələp mun, kə mun dee a nen wur mo ndəən Kristi nciit-nciit kə pan wur. Mbii mo des aasə, nciit-nciit kə mbii dewur kə ten sat nə wudin cìn mo pəgyet dī nshee.

¹² Mun de mu shee canciin nkaa Kristi, wu yit kə mun kwoop Naan mbə dedes wur.

¹³ A wun zak, wu dee a nen Naan mo kaadi wu kələng pwoo de azeen nə. Pwoo deret de nə jì bam wun, kaade wu shinzeen nKristi sə, be Naan wur kə le sar wur nkaa wun, kə nwun dee de a mə wur. Kaade wur shin Riin Debang nə nwun nciit-nciit kə mbii dewur kə ten sat sə.

¹⁴ Riin Debang de Naan wur shin nə mun, wur dee a mbii denshee de nə kám mun nə, mu lap mbii de Naan ten sat nə wudyin shìn nen wur mo. Desə nə kám mun nə, Naan wur shínpee nen de mo a məwur mo, yit kə mu kwoop Dehai wur dī.

Dangnaan Pool

¹⁵ Mbə mbii desə, be yool mparpuus de wen kələng pwoo nkaa shinzeen fuu nə ndəən Daa Jesu, kə wal fuu nə mbə nen Naan mo jir,

¹⁶ be baa wen kən nook pələng Naan mbə wun kas. Wen kən pan wun ndəən dangnaan fen mo.

¹⁷ Wen kən ɗang pə Naan kə Daa fun Jesu Kristi, puun ɗehai shidaar-shidaar nee, ɗewur nshin Riin nwun, kə wur le nwun ɗee a nenseen mo, kə woo man mə Naan nwun rəret hakyeng.

¹⁸ Yit kə pətuup fuu mo wang ɗi, kə wu naan pee ɓang wur ɗi, mbəkə wu man mbii ɗe wuu canciin ɗe ke ɗewur kə ten pərep wun mbə nə, kə kop ɗewur nshin nen wur mo.

¹⁹ Baa mee ngwe mmak kám ɗeɗes wur, ɗe nə nkaa cìn ɗak nɗəən mun kas, mun nen ɗe mu shinzeen wur. Iiko ɗe nə nkaa cìn ɗak nɗəən mun, nə nciit-nciit kə ɗeɗes mə ɓal wur,

²⁰ ɗe gyet wur cìn ɗak kə nə, mbəkə wur yool ɗe kə Kristi a peemúut, kə nNaan wur le kə Kristi kàa tong nsarse wur nɗəən ɗengnaan.

²¹ Kristi wur met mbal mishkoom mo jir, kə iiko, kə ɓal, kə ɗes mə se mishkoom mo jir. Səm wur nə met koor səm mo jir. Baa a nɗəən bit ɗeyaksə ɓejee ɗak kas, ɗangbe kə nɗəən bit ɗe mo ndung jì akyeen.

²² Naan wur kə ten le mbii mo jir ndershii wur, kəzak wur le wur ɗee a kàa mbii mo jir mbə Ekəlisya nə.

²³ Kuur nendəm nɗang wur mo, a shin wur, ɗe mo gam kə wur shikáa wur, ɗewur gam mbii mo jir, koo a nɗəən ar ɗeɗangyi

2

Wuu Kat Seen nDəən Kristi

¹ Gyet nyam ɓe, wun a ɗeməturep nɗəən tep waar kə shikbish fuu mo.

² Gyet nciit kə mənə, ɓe wuu mwaan a nɗəən coor ɗebish mə yil ɗesə, kə nwun kələng a ɗoo mə

mishkoom bal kə riin de mo ndəən kut mo, riin de nə pə cin dak nkaa nen de mo cii cìn dyen Naan.

³ Gyet mu tong a kaa mo sə, ndəən coor mə nan fun mo. Kə gyet mu cìn mbii de mu naa mo shang nnan fun mo, kə pan mə pətuup fun mo zak. dang ndəən tong fun, kaa koor gurum mo sə, be də mu ten mu dee a de mun nshwaajeel mbə tuup Naan.

⁴ Dang mbəde kussuk Naan kə wal wur nə des zam,

⁵ be jir de gyet mun a deməpurep ndəən shik-bish fun mo, be wur le kə mu kat seen ashak kə Kristi. Nə a mbə yit naajeel Naan, dangbe mu kat bam.

⁶ Naan wur nle kə mun yool ashak kə Kristi, kə wur le kə mun tong ashak kə wur ndəən dengnaan mbə səm kə Kristi Jesu.

⁷ nDəən bit de mo pə jì, be wur nkám mmun des shi dedes wur de baa mee gurum mak kám nə kas. Desə nə a yit naajeel wur dedes mbə mun ndəən Kristi Jesu.

⁸ A mbə yit naajeel Naan, dangbe wu kat bam, mbəde wu shinzeen. Baa wu kat bam desə nə a mbə mee dak deret de wu cìn kas, nə a zuum mə Naan.

⁹ Baa nə a mbə mənə dak kas. Mpeemənə, be taji mee gurum diyeepkää wur kas.

¹⁰ A Naan wur le mun shi sar wur, kaade mun de sə, dangbe yaksə ndəən Kristi, be wur le mun a mbə cìn dak deret mo, dewur kə ten dak nə le mbə mun, mbəkə mun cìn mo di.

Mun Jir A Demədong nDəən Kristi

¹¹ Taji wu mundər kas, nə, gyet nyam be wun a nen de baa mo làa wun a nen Yahudi mo kas. Be

gyet nen Yahudi de də mo lesut a nen de mo can mo ndəən nan shi sar gurum mo, moo pet wun a nen de nsuluk mo.

¹² Taji wu mundər kas nə, gyet mbít mənə mo, be baa wu kus kə Kristi kas, kə baa gyet wu man Naan kas. Gyet mo shwat wun ndəən jep mə nen Yahudi mo, kə gyet wun a məzep mo. Mbəde Naan kə ten bəlemcuk shi toom, kə baa gyet wun kə mee mbii canciin ndəən yil nə kas.

¹³ Amma, yaksə ndəən Kristi Jesu, be wun de gyet wu jong, mo kə jì kə wun kus, shi toom Kristi.

¹⁴ A Kristi jì kə tongryang mmun, be wur le kə nen Yahudi mo dee a deməndong kə nen de baa mo a nen Yahudi mo kas. Wur shirip kok de gyet nə bək mun, mbəkə mun dee dī a shaarshak.

¹⁵ Wur mang Wàar nen Yahudi mo baa kənə aku, mbəkə wur waa le gurum depwoo mo de ndəən dang devəl sə mo. De a ndəən ar desə, be wur jì kə tongryang.

¹⁶ A shi muut wur nkaa shiyeepyoom, be wur tu mbii de nə jì kə ciishak ngurum mo. A shi shiyeepmúut wur, be wur bəl dang mo shini-shini, kə mo dee a deməndong ndəən Naan.

¹⁷ Jesu wur jì satpwoo, mə ryang nwun. Wun nen de gyet wu jong kə Naan, kəzak, wur jì kə pwoo nə nen de gyet mo kus kə Naan zak.

¹⁸ A ndəən Kristi be mun gurum jir, mu mak jì ndəən Riin deməndong pə puun fun dī.

¹⁹ Mbəmənə, be yaksə, wun nen de baa wun a nen Yahudi mo kas, baa wu kuđi a məzep koo pəkor mo kas. Yaksə wun a deməndong kə jepyil mə nen Naan mo, kə nwun dee a jeplu mə Naan mo zak.

²⁰ Mo dyik wun a nkaa kuk de jeplep kə Jesu mo, kə nensatpwoo Naan mo kə ten dyik nə. Jesu Kristi wur shikáa wur, a nghək dedes mə kwang lu nə.

²¹ A ndəən wur, be jir koor lu nə kəkàa nkaa wur, kə a wur le kə lu nə wurang, kə nə dee a lu dəbang mə Daa.

²² A ndəən wur, be mo dyik wun, kə nwun dee a pee di Naan wur tong di, shi riin wur.

3

Dak De Pool Cìn mBə Gurum Mo

¹ A mbə desə, be wen Pool, an a shishoot mbə Kristi Jesu, mbə wun nen de baa wun a nen Yahudi mo kas.

² Azeen-nzeen wu man nee, ndəən dəret Naan, be wur shin dak desə nə nwen, mbəkə nghan cìn di mbə wun.

³ Naan wur woo mbii desəsok mo nwen dewur kə ten sat nə wudin ncìn nwen. Wen kən ran pwoo nwun lee nkaa nə.

⁴ Katdang wu tang mbii de ghan kən ran nə, be wun mmanshii mman fen, nkaa mbii desəsok mə Kristi.

⁵ Gyet nyam, be baa mo woo mbii desəsok nə mo ngurum mo kas, amma yaksə be Naan wur kə woo nə agaak pee jeplep Jesu Kristi mo, kə nensatpwoo Naan dəbang mo, shi Riin wur dəbang.

⁶ Mbii desəsok nə a nee, nen de baa mo a nen Yahudi mo kas, yaksə ndəən pwoo dəret nə, be mo kat dəret mə Naan ashak kə nen Yahudi nə mo. Kəzak yaksə, be nen de baa mo a nen Yahudi

mo kas, mo dee a mbii deməndong. Mo mak sekop ndəən mbii de Naan wur kə ten cweer nə, nwur gam nə ndəən Kristi.

⁷ A mbee pwoo deret desə, be Naan wur nle kə ghan dee a ngucin dak wur, nciit kə zuum deret mə yit naajeel wur dewur kəcin nwen, de nə nkaa cin dak ndəən bal wur.

⁸ Koo de ghan a detaakat met jir ndəən nen Naan mo, amma Naan wur cin dak desə nə nwen, de nə satpwoo deret nə mbə nen de baa mo a nen Yahudi mo kas. Pwoo nkaa long Kristi de baa nə kə peekyes kas.

⁹ Kəzak, mbəkə nghan le kə gurum mo manshii mbii desəsok mə Naan mo di, de Naan dewur le mbii mo ndəən nyil nə jir, be wur kə ten sok mbii desə nə mbee bit mo des.

¹⁰ Pan wur desə nə, yaksə ndəən nendəm ndang wur mo, be dedes mə seen wur nə dee agaak ndəən ar mo shini-shini, pə nenlep Naan mo kə iiko de mo ndəən dengnaan

¹¹ Nciit-nciit kə mbii de Naan wur kə ten sat nee, wudin ncin nə shindəm ngaa-ngaa, dewur gam nə ndəən balkaa fun ashak kə Kristi Jesu Daa fun.

¹² Kə shinzeen fun ndəən wur, be mu katbal mpətuup, kə mu dəm de ntoom Naan, baa a shi kəərmuut kas.

¹³ Wen kən dang pə wun, taji kwak fuu mo murep kas, mbəde jir shawaajeel de an nkaa shwaa nə a mbə wun. Shwaajeel fen nə kəkoop nə pee wun di.

Dangnaan mBə Nen Afisus Mo

¹⁴ A mbəmənə, be an kən kurum ntoom puun,

¹⁵ a mbə wur, be koo a weyi de mo ndəən dɛngnaan kə de mo ndəən nyil desə moo kat səm wur.

¹⁶ Wen kən dang pə Naan ndəən long wur dedes, mbəkə wur shin iiko de nwun ndəən Riin wur. Mbəkə nwun katbal de ndəən pətuup fuu mo.

¹⁷ Mbe kə Kristi wur tong ndəən pətuup fuu mo, mbəde wu shinzeen wur. Wu shamseen, kə nwun dar nkaa kuk de nə a wal.

¹⁸ Mbəkə nwun, ashak kə nen Naan mo, be wu man kaam, kə shwal, kə wurang, kə jurum mə wal mə Kristi di.

¹⁹ Kəzak, mbəkə wu man wal mə Kristi de nə met nkoor man mo jir, mbəkə wu gam di kə man Naan ndəən pətuup fuu mo.

²⁰ Yaksə, pee wur, dewur kə iiko de nə cìn dak ndəən mun, met mbii de mu mak dang mo, koo pan de mo ndəən pətuup fun.

²¹ Dedes nə dee a mə Naan ndəən nendəm ndang wur mo, kə ndəən Kristi Jesu mbə pə mo jir, yool yaksə kə, har ngaa-ngaa. Nə a kəsə.

4

Mo Bəl Mun Kə Fwooshin Kristi

¹ Wen de an a shishoot mbə səm Daa. Wen kən dang pə wun, mbəkə wu mwaan-mwaan de mo lapshak kə petpee de Naan wur kə pərep wun mbə nə.

² Wu sham kə kaa fuu mo koo pəanyi. Wu cìn mbii mo ndəən dyen, kə wun gung zak. Wu kám wal fuu mo agaak, kə nwun fwangshak zak.

³ Wu gung, kə nwun tap de kə balkaa de Riin wur shin nwun, shi tongryang de nə bəl wun ashak.

⁴ Shin nə a mändong, kə Riin nə mändong bejee. Kaadi mo kə pərep wun, ndəən canciin mändong nkaa mbii de mo kə pet wun mbə nə.

⁵ Daa a mändong, shinzeen nə a mändong, baptisma nə a mändong,

⁶ Naan a mändong, dewur a puun fun jir. Wur met mbii mo jir, kə a wur cìn đak ndəən mun jir, kə a wur ndəən mun jir zak.

⁷ Dang koo a weyi ndəən mun, be wur kə lap đeret nciit-nciit kə zuum kə Kristi.

⁸ Kaade mo kə ran ndəən bəət haal Naan sə nənee,

<<Kaade Kristi wur kaa adeng,
be wur pan kərem

deyiyak mo des ashak kə wur,

kə wur shin zuum ngurum mo zak.>>

⁹ Yaksə, be nənee, <<wur kaa adeng >> be shii mənə a mii? Shii mənə nee, nshee be wur sham ndəən jurum kə peekyes kə yil desə.

¹⁰ Mbəmənə, gwar de gyet wur sham, a wur a gwar dewur kaa adeng-deng a kəkyeen dengnaan mo, mbəkə wur gam deng kə yil jir.

¹¹ A wur shìn zuum ngurum mbəkə npak mo dee đi, a jeplep mo, kə npak mo dee a nensatpwoo Naan mo, kə npak mo dee đi a nenkop pwoo Naan mo, kə npak mo dee đi a Pasto mo, kə npak mo dee đi a nenkám kam mo zak.

¹² Wur shin zuum desə mo, a mbəkə nə đak nen Naan mo de, mbə bamshak, kə mbəkə mo dyik fwoshik kə Kristi đi.

¹³ Nə aasə, be mun jir, mun nyool mu dee a đeməndong ndəən shinzeen fun, kə man fun de nə ndəən Làa Naan. Mun nyool mu dee a nen de

kə man mo, Mbəkə mun wul mbə gam dedes mə Kristi.

¹⁴ Be baa mu kudi a jep dedyeen mo kas mənə, de mo nnum mun shindəm sə, Mbəkə mo mang mun pán, shi koo a kyaan kám dedangyi kas. Mo a nenseen mo de mo a korong mbə bərəm dung.

¹⁵ Akoppee mənə nə ret kə mun sat zeen nə ndəən nwal. Nə ret kə mun wurang ndəən mbii mo jir, ndəən Kristi dewur a káa fun.

¹⁶ A mbə wur, dangbe koo a beep dedangyi, mo shini-shini, mo tap bəl ashak, kə koo a peebal dedangyi, nə katbal a ndəən wur. Katdang koo a beep dedangyi nə kə cín dak war rəret, be fwoshik nə nwurang, kə nə dyik set di ndəən nwal zak.

Seen Depwoo nDəən Kristi

¹⁷ nDəən səm Daa, be nkən satpwoo wun shibal nə, taji wu sat a ntong kaa nen de baa mo a nen Yahudi mo kas sə, de pan mo a debuu.

¹⁸ Pan de ndəən pətuup mo, nə a mə peenkwoo, baa mo kə mee ləbet ndəən seen de Naan shin kas, mbəde baa mo kə mee man kas, kə mo dee a nencinshik mo.

¹⁹ Baa mo kudi kə naashweep kə mee mbii kas. Mo fes shínkáa fur mo mbə cín mbii debish mo, kə moo coor mbə cín koo a mbii debish dedangyi. Baa moo kə mee yaasut kas.

²⁰ Amma baa a mbii de wun wu kám pee Kristi de mənə kas!

²¹ Mo sat nnə, wuu ten wu kələng pwoo nkaa wur, kə mmoo kám nwun zeen de nə ndəən Jesu.

²² Wu shwat suk desəər nə mo wu baa kə mo aku, de də moo nnum wun ndəən coor mə nan sə.

²³ Nə a təng kə npətuup fuu mo kə pan fuu mo dee a depwoo,

²⁴ Kəzak, nə a təng kə wu jwal fwoshik depwoo nə mo, de Naan wur dak mənə shikaa fin sə, kə nə woo káa nnə agaak ndəən seen de nə azeen-nzeen de nə a deret kə debang.

²⁵ Mbəmənə, wu baa kə dung ndəən wun, kə koo a weyi be wur sat azeen ngənəən wur bejee dak. Mbəde mun a deməndong kə shak ndəən Kristi.

²⁶ Katdang wu langtuup, be taji wu cìn shikbish kas. Taji puus shamru, be wun de nkaa langtuup kas.

²⁷ Taji wu shínpee ngujwaan kas.

²⁸ Ngwe de wur cìn wat, be taji wur baa cìn de kas, dangbe nə ret kə wur cìn dak deret shi sar wur, mbəkə wur mak cìn mee mbii de nen de mo mbut njeel

²⁹ Taji pwoo debish mo put ndəən pwoo fuu mo kas, dangbe dang a mbii deret mo, de mon ndyik wun, kaadi nə tap ret kə pee nə sə. Mbəkə nə jì de kə deret nen de moo kələng nə.

³⁰ Taji wu wàt pətuup nRiin Debang mə Naan kas, wur de a wur dee a langtəng nə, wuu dee a de fufwang mbə parpuus de mon mbam wun.

³¹ Wu pwat kə pwoo dedeet mo, kə ciishak, kə tuup, kə butbish, kə fələppee ashak kə cìn nyang mo jir.

³² Dang nə ret kə nwun naajeel shak, kə nwun bam shak, kə nwun fwo dī nshak, kaadi Naan wur fwo dī nwun ndəən Kristi sə.

5

Mwaan nDəən Peebang

¹ Kaade wun a jep Naan mo dewur wal wun sə, be nə a tæng kə nwun kám shiimwaan Naan.

² Kəzak, wu mwaan ndəən wal, kaade Kristi wur wal mmun sə, be wur shın kaashın mbə mun kaa zuum kə mbiizuum de nə kə toos shang shang pə Naan dı.

³ Taji pwoo nkaa ngaa, kə mbii debish mo, kə rəbet mbii mo pwat ndəən pwoo fuu mo kas. Mbəde pwoo nkaa kaan kə mənə mo, baa nə ret kə mo pwat mpwoo nen Naan mo kas.

⁴ Kəsə zak, taji mee pwoo debish mə le naash-weep kə pwoo mə mwen mo, kə pwoo debuu mo, mo pwat ndəən pwoo fuu mo kas, amma wu yit kən plang put pwoo fuu mo.

⁵ Taji wu mundər nee, nen de moo cın ngaa, kə nen de pan mo a debish, kə ngutələk mo, be baa mee kaan nen mənə moo mee ləbet mə sekop ndəən mulki Kristi kə mə Naan kas.

⁶ Taji wu yit kə mee gurun nnum wun shi pwoo debuu mo kas, mbəde a mbə mbii mo kaa desə mo be tuup Naan nə taa nkaa nencii kələngpee mo.

⁷ Mbəmənə, taji wu balkaa fuu ashak kə nen mənə mo kas.

⁸ Gyet nyam, wun a ndəən peenkwoo, dangbe yaksə wun a ndəən peebang, ndəən Daa. Nə ret kə wu mwaan kaa nen de mo ndəən peebang nə sə.

⁹ Dak nen de mo ndəən peebang, nə a ndəən mbii deret mo, kə de ndəre mo, kə zeen zak.

¹⁰ Wu gung, kə nwun kám mbii de mon nret nNaan nyit.

¹¹ Taji wu lesar fuu mo ndəən dak de mo a mə peenkwoo, de baa mo kəkoop nə kas, dangbe nə ret kə wu woo dak mənə mo agaak.

¹² Nə a mbii naashweep mbee satpwoo nkaa mbii de moo cìn mo a səsok.

¹³ Dang katdang jir mbii de nə agaak, a pee de bang di, be nə ndee a de gurum mo mak naa nə. Mbəde jir mbii de gurum mo mak naa nə, be nə a ndəən peebang.

¹⁴ Nə a kaadi mo kə ran ndəən bəət haal nNaan sə nənee,

<<Ngusaam, a mii, a yool a peemúut

Mbəkə Kristi wur

shin peebang de ngha>>

¹⁵ Wu tap kə shiimwaan fuu mo. Taji wu mwaan kaa mwen mo sə kas, dangbe wu mwaan kaa nen de kə seen mo sə.

¹⁶ Wu cìn dak koo a pee dedangyi, mbəde teer de yaksə nə mo gam kə mbii debish mo.

¹⁷ Mbəmənə, be taji wu dee a mwen mo kas, amma wu manshii kə mbii de Daa wur rəbet kə nwun cìn.

¹⁸ Taji wu shwaa am anab kə nə yuur wun kas, mbəde mənə mak jwaan wun, amma wu dee a degəgam shi Riin Debang.

¹⁹ Wu sat mee pwoo kə shak shi kook de mə kwoop mo, kə kook de mo a mə Riin. Wu cìn kook deret mo nNaan, kə pəlang ndəən pətuup fuu mo.

²⁰ Koo pərayi be wu plang Naan puun mbə mbii mo jir ndəən səm nDaa fun Jesu Kristi.

Mat Mo Kə Mish Mo

²¹ Wu shin dedes ndər shak, mbəkə wu shin dedes di nKristi.

²² Mat mo, wu shin de dedes mmish fuu mo, kaadi wuu cìn nDaa sə.

²³ Mbəde mish wur a káa mat, kaadi Kristi wur a káa Ekəlisya sə, shii kə mənə a fwooshin fin kə wur shikáa fin a Ngubam war zak.

²⁴ Kaade Ekəlisya war ndər Kristi, nə aasə zak, wun mat mo, wu shin dedes mmish fuu mo ndəən mbii mo jir.

²⁵ Mish mo, wu wal mmat fuu mo, kaadi Kristi wur wal Ekəlisya nə sə, har wur shinkaa shin mbə war.

²⁶ Mbəkə wur le war dee di a dəbang shi vvang war kə am, kə pwoo Naan.

²⁷ Mbəkə wur dak Ekəlisya nə le de nshin, ndəən dedes, kə demen, baa ashak kə mee rap, kə mee pee taakat mbut mo kas. Mbəkə mo dee de a dəbang baa kə mee rap kas.

²⁸ Ni ret kə mish mo wal mmat fur mo kaa sut sə. Ngwe dewur wal mmat wur, be wur wal a nshin mənə.

²⁹ Baa mee gurum kə cam cii shin kas, dangbe wur tap shin mbiise nnə, kə wur tap kə nə rəret, kaadi Kristi wur cìn Ekəlisya sə

³⁰ Mbəde mun a beep mə foshik nwur.

³¹ A mbəmənə, be gurum wur nyit puun wur kə nəən wur, kə wur balkaa de ashak kə mat wur, kə mo vəl mo dee di a deməndong.

³² Desə nə a mee mbii dedes desəsok. Mbii de wen kən sat nə, a nkaa Kristi kə Ekəlisya.

³³ Jir arang be wu yit koo weyi wur wal mmat wur, kaa kaashin sə, kə mat war shin dedes mmish war zak.

6

Jep Mo Kə Puun Mo

¹ Jep mo, wu kæləng pwoos mpuun fuu mo ndəən Daa, mbəde mənə a mbii de ndəre.

² <<A shin dedes mpuun fwa kə nən fwaa mo,>> desə nə a Wàar denshee de mo kə ten le,

³ <<mbəkə a tong di ryang, kə mbəkə a kat teer mo di des ndəən nyil nə.>>

⁴ Puun mo, taji wu le kə pətuup jep fuu mo wat, kə nə le kə mo cìn tuup kas, amma wu kyeer mo, kə wu kar mo ndəən kám de mo a mə Daa Naan.

Kərem Mo Kə Nen De Dyel Mo

⁵ Kərem mo, wu kəleŋgpwoos nen de moo dyel wun nsar fur mo. Kən sat a puun fuu de mo a mə yil desə nə. Wu kəleŋgpwoos mo ndəən kəer kə đaar shi pətuup məndong, kaadi wuu cìn nKristi sə.

⁶ Taji wu cìn đak a yit gurum mo bejee, kə mo plang wun de kas, amma wu cìn đak kaa kərem mə Kristi sə. Wu cìn dyen nNaan ndəən pətuup fuu mo.

⁷ Wu cìn đak shi pətuup đeret, mbəde wu cìn a nDaa Naan, baa a mmee gurum kas.

⁸ Taji wu munder kas nə, đak đeret de gurum kə cìn mo, be wur nwaa lap kwat nə pee Daa di, koo đewur a kərem, kə đewur a laalu.

⁹ Wun nen de wun kə kərem mo wu cìn mbii đeret mmo zak. Taji wu wuk mo kas, mbəde wu man nə, Daa fu kə moo, wur a ndəən dengnaan, baa wur kə nshwatyit kas.

Leelek Naan Mo Jir

¹⁰ Peekyes nə, wu đar balbal ndəən Daa ndəən iiko mə dedes wur.

¹¹ Wu jwal leelek de Naan wur shin mo wun jir, mbəkə nwun mak dar di balbal nkaa Ngujwaan kə gwampee wur.

¹² Mbəde baa mu cìn lek nə a nkaa gurum mo, de moo nan kə toom kas, dangbe nə a nkaa se mishkoom, nen iiko de mo a mə Ngujwaan mo, nkaa se mishkoom kə nen peeknwoo de ndəən dangnaan mo.

¹³ Mbəmənə, be wu jwal leelek de Naan wur nshin nwun, mbəkə nwun dar di balbal ndəən teer debish mo. Mbəkə taji Ngujwaan wur se koorong nkaa wun kas.

¹⁴ Wu dar balbal shi dak suk, kə bwoot bwoon fuu mo shi zeen, kə cìn mbii de ndəre kaa kawung de nə tap tuur ngurum sə.

¹⁵ Wu jwal kwoopshii nshii fuu mo, mbə satp-woo deret, de nən jì kə tongryang.

¹⁶ Koo pərangyi, be wu mang gwat de nə a shinzeen ashak kə wun, mbə tap pas mə wus de gwar debish nə wur mpwas shinji nkaa wun.

¹⁷ Wu mang bam de Naan wur cìn nwun, kaa mbiikáa shool de nenlek moo lep mbəkə nə tap káa di mmo sə. Kə wu dyel pwoo Naan nə, kaa kwai de Riin Debang wur shin nwun sə.

¹⁸ Wu dangnaan (leshap kə Naan), mbə mbii desə mo shidaar-shidaar ndəən Riin. Wu tong shi gongpee, kəzak, wu gung ndəən mbii mo jir. Wu cìn dangnaan (leshap kə Naan) mbə nen Naan mo jir.

¹⁹ Wu dangnaan (leshap kə Naan) mbə ghan zak, mbəkə Naan wur cìn mbii de wen nsat mo di, kə mbəkə ghan sat mbii desəsok mə pwoo deret nə mo, de shibal baa a shi kəərmuut kas.

²⁰ A mbə pwoo deret nə, dang mo lep an mbəkə wen sat nə di. Be wen a shishoot shi tasek mə shool yaksə. Jir kə de an a shishoot, be wu cìn dangnaan (leshap kə Naan), mbəkə wur shinbal di nwen, kən satpwoo deret nə de shibal, kaadi nə ret kə wen cìn sə.

Tokshik Mə Kes Nə

²¹ Tikikus dyemnəən fun de mu wal wur, dewur a kərem Daa azeen-nzeen, wur nsat mbii mo nwun jir, nkaa an, kə nkaa dak de ghan nkaa cìn nə.

²² Wen kən ten nlep wur shindəm pee wun de, a mbəkə wur satpwoo di nwun nkaa mun, mbəkə nwun man tong fun de, kə nə bam pətuup fuu mo di zak.

²³ Naan puun, kə Daa fun Jesu Kristi shin tongryang, kə wal, kə shinzeen ndyemnəən fun mo jir.

²⁴ Deret Naan nə dee ashak kə nen de mo wal nDaa fun Jesu Kristi, shi wal de baa nii peekyes kas har ngaa-ngaa.

Manji Yiljep Mupun New Testament

copyright © 2024 Initiative for the Translation and Development of African Languages and The Seed Company

Language: Mupun (Mwaghavul)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-03

PDF generated using Haiola and XeLaTeX on 10 Sep 2025 from source files dated 3 Jul 2025

77a1013c-7c23-599f-9af1-1adbfc09489